

四庫全書

集部

欽定四庫全書

集部

眉山詩集卷一
三

詳校官庶吉士臣陳若霖

侍讀臣孫球覆勘

總校官編修臣王燕緒

校對官中書臣葉蘭

謄錄監生臣任銜葵

欽定四庫全書

集部三

眉山集

別集類二 宋

提要

臣等謹案眉山集二十二卷宋唐庚撰庚字子西眉州丹稜人紹聖中進士調利州治獄掾遷閬中令入為宗學博士以張商英薦除提舉京畿常平倉商英拜相庚為賦內前行卒以此貶安置惠州六年會赦復官承議郎

歸蜀道卒劉克莊後村詩話云唐子西詩文皆高不獨詩也其出稍晚使及坡門當不在秦晁以下徐度却掃編記庚自言為文當學司馬遷為詩當學杜甫其自命甚高今觀所作雖不逮所言而文善議論詩亦工緻其在嶺南諸作當時太學諸生競相傳寫稱小東坡至為刊板以行宣和間其弟庾併取其舊作編入史載本集二十卷

國朝雍正間歸安汪亮采校刻分為詩十四卷
文八卷其末附三國雜事世有單行本今別
著于錄惟以詩文共為二十二卷焉乾隆四
十五年十月恭校上

總纂官

臣紀昀

臣

陸錫熊

臣

孫士毅

總校官

臣

陸費

墀

眉山詩集原序

近世以文集顯於時者文忠公有六一居士集舒王有臨川先生集叅政呂公有觀文集丞相張公有乖崖居士集蓋其官如是其文如是雖樵夫野老市井庸人皆能道其姓字而樂誦之故言之易以信而傳之易以廣其勢然也乃若有其官而文不顯有其文而官不顯二者不可兼故其傳之誠難若唐先生者所謂有其文而官不顯者也先生名庚字子西眉州眉山人也紹聖中

以進士中第為州縣官至大觀始入為博士士大夫稍道其文而世亦未盡知之政和初謫居海表流離困苦蓋六年而不返然身愈窮而文愈富也其後歸京師僦居於景德寺予時與先生比舍而日得見先生之所為文頗多嘗請其本以傳而先生辭曰予以是得名亦以是得謗可一覽而足何必匄而去也於是不果傳焉退復私念曰先生之文金玉也雖閑藏埋沒不求聞知然氣焰光彩久而必見於世蓋所謂不待官而後顯也已

昔屈原以離騷顯陶潛以歸去來詞顯盧仝以茶歌顯
顧當時達官豈無其人而三子獨得顯於世豈非其文
乎今先生之文予知其不久遂顯也先生死不一年果
有橐其文以來京師者而太學之士日傳千百本而未
已然惜其所傳者止此今始叙而藏之庶幾他日必有
得其完本者宣和四年八月十五日溫陵呂榮義德修
撰

政和中先君寺丞赴官潮陽道出鵝城謁國博唐公一

見傾蓋如平生自是書札往來無非論文評詩未嘗一語以及俗事也而道義之交習尚之同先君固已序之矣得唐公之文凡四十五首詩賦一百八十五首唐公嘗云吾以是得名亦以是得謗不欲盡傳諸人故所得止如是而已康佐承乏惠陽暇日閱寓公集蓋東坡先生與唐公謫居時著述也唐公之文凡十有二首詩賦一百十有一首與先君所傳頗有重複既而進士葛彭年以所藏閩本相示文凡五十六首詩賦二百八十七

首較之所見稍加多矣而篇帙殷亂句讀舛謬不可辨
未幾又得蜀本於歸善令張匪躬之家文凡一百四十
二首詩賦三百有十首較之閩本益加多矣而增損甚
少可以取正康佐以郡事倥傯遂屬教授王維則讎校
旁援博取凡所辨正悉有據依而唐公之文遂為全篇
因其名類勒為二十二卷命刻板摹之既以博示學者
俾識其真且以著先友之義不沒其傳既成謹書於卷
末紹興二十一年仲冬左朝奉郎權發遣惠州軍州主

管學事兼管內勸農事鄭康佐題

予兄子西自齠齔學為文出言已驚人如賦明妃曲題
醉仙崖什上任德翁序之類時年方十四五老師匠手
見之無不褫魄落膽及入官以來所著愈多至被謫南
遷其文益工然隨作隨散不復留藁故今所存者極少
此見京師刊行者止載嶺外所述多舛謬失真害理恐
誤學者觀省而不能以傳諸永久因併取其少年時所
為文隨卷附之庶以廣其傳云昔昌黎文公集其子壻

李漢編而序之杜子美詩故相呂公微仲為作年譜予
於兄手足之愛親炙最久其編次之意發揮之功庶幾
於二子焉若夫子西兄之文名播天下為縉紳之所歆
慕至其著撰有先後所造有淺深則覽者當自辨之不
待予言而後知也宣和四年六月朔日弟庾謹序

欽定四庫全書

眉山詩集卷一

宋 唐庚 撰

賦

南征賦

始攝提之孟冬予負罪而南馳雪盈尺而更繁風三日而猶吹體凍極而若無心怖甚而忘悲凡再信而至許覺驚魂之稍歸訪景福之遺基指空郊之荒漠曾未忝之無有矧樂梁之丹雘國已扼于三馬臣不聞于一鶚

豈當世之無儒抑此病之難藥道昆陽而流歎慘悲風
與愁雲階一夫之僭竊紛萬鬼之煩冤嗟世祖之論功
忘王章之曩言既直鉤之不食終曲突之無恩過叔子
之舊邦登峴山而痛哭方關右之放賈蓋眼中之拔鋸
獨何心而表留卒養癰而潰肉倘遺靈之猶在當舉白
而相沃盡荆門之犖确瞰蜀江之湯湯念故人之久別
覺良晤之甘香稍回翔于澧浦忽凌亂于瀟湘時廓寥
而浩蕩復收斂而淒涼咏九歌之餘哀閔三閭之孤趨

豈公子之足怨實舉世而無與內不憚于女嬃外見非
于漁父持此道以奚歸亦各安于所處自是遠矣行人
漸稀水愈激而愈清山益峭而益竒造郴嶺之窮處云
湟關之故基客至此兮返顧雁至此兮北飛眷武漢之
毒淫弔文淵之矍鑠射參狼于隴阪觀跼齋于浪泊奮
身出于萬死騰口喧于百惡信老子之足哀覺少遊之
差樂經韶陽而再宿寫石上之遺聲悟神聖之在宥如
天地之生成彼禽魚固自有理而日月未嘗不明雖吹

萬之不同吾得一而皆正捨湏陽之短策放清遠之孤
舟觀碧落之靈秘嘲峽山之媚柔承懸崖之滴乳褰裊
岸之垂樛探羊城于浩茫發蒲澗于深幽窮一時之詭
觀渺萬古之清愁蓋明年之正月始稅駕于羅浮

省愆賦

唐子謫居嶺表既已半載杜門時省愆而慨曰身邪心
邪孰陷吾于罪乎吾將求之身則身非我有四大所會
地水火風誰為之宰吾將求之心則心不在內復不在

外不在中間是將安在晝夜以思寢食皆廢骨為之出
髮為之改夢有告子曰甚哉子之蔽也在性本空念念
滅壞反復尋繹祇益咎悔道逢臭腐何足盼睐玩味不
已適足自穢淨是妄而沉垢穀猶無而引稗譬之身體
本自安泰或作病想便自嬰瘵識此病之誰受尚何施
于砭艾譬之手足伸縮無礙忽作縛想舉動輒絀悟此
縛之無實即無繩而可解方聳聽于妙語失胃中之結
魄若春動而冰泮若秋至而葉敗回視無始以來幾千

萬世所作罪業悉消散而崩潰矣豈獨今之所以流落
顛沛者哉覺而思之曰噫此殆維摩詰也攬衣而起正
冠束帶稽首西望作禮而退

惜梅賦

有序

閨中縣庭有梅樹甚大正當庭中出入者患
之有勸予以伐去者為作惜梅賦

縣庭有梅株焉吾不知植于何時蔭一畝其疎疎香數
里其披披侵小雪而更繁得朧月而益奇然生不得其

地俗物溷其幽姿前胥史之紛拏後囚繫之嚶呻雖物
性之自適揆人意而非宜既不得荐嘉實於商鼎效微
勞於魏師又不得托孤根于竹間遂野性于水涯恨驛
使之未逢驚羌笛之頻吹恐飄零之易及雖清絕而安
施客猶以為妨賢也而諷予以伐之嗟夫吾聞幽蘭之
美瑞乃以當戶而見夷茲昔人之所短顧仁者之所不
為吾寧迂數步之行而假以一席之地對寒艷而把酒
興清香而賦詩可也

平臺賦

有序

平臺梁王劉武作也班史稱平臺杜甫稱吹
臺世以謝惠連嘗為雪賦也則又謂之雪臺
舊說在大梁城東北如淳晉灼云在大梁城
東二十里今在城東南蓋漢距今且千歲城
郭凡幾變則聞見之異宜哉作平臺賦

予與客遊汴都之東南登梁王之平臺顧草木之搖落
懷古人以衰徊客慨然歎曰吾聞祖龍失劍楚竊其柄

漢鑒其孤矯枉過正齊楚趙魏燕韓之郊荆揚兗豫青
徐之境蟠城千里星散碁布原田溝澮不知其幾千萬
頃瓜分幅裂以王一姓於是擅爵人而赦死罪載黃屋
而私蹕警鼓銅破山煮海絕流侈極奢窮然未有如梁
之親倖者也井畢煌煌實豫之疆北界泰山西抵高陽
帝子出閣有烜其光金錢布幣子女玉帛錦繡寶器車
馳轂擊轆轤繹繹挽來於梁爾乃羽翼鄒枚腹心勝詭
郊關之圓三百餘里萬甍鱗鱗樓閣橫斜擬於未央之

邃也峭築峨峨蔽景干霄擬於漸臺之峻也靜影潭潭日星泳涵擬於太液之深也麋鹿咩咩禽珍獸奇擬於上林之多也旌旂纛旆前騎後乘擬於五柞之游也鷲擊盧馳躡景追飛擬於長楊之獵也千金一壘斷瓊鏤瑰擬於武庫之藏也游談之士濡毫緩頰曳長裾而從之游擬於公車金馬之待詔也夫侈極則疑勢偪則離弱幹強枝安能久而不危也耶予曰噫子知其一而未觀其二也勝廣之亂毒於管蔡呂霍之變危於吳楚三

馬之偪痛於燕秦王桓之禍深於齊趙子曷不較其輕重哉周室東遷晉鄭是依朱虛叱咤祿產殲夷五葉之後宗國陵遲洗垢求瘢吹毛索疵前刈肘腋棄絕藩籬隳犬牙之形勢壞盤石之宏基故長沙舉袂而不得逞中山感音而涕洟濟南之墟梓柱生枝以噓廢食卒死於饑可不悲哉客憮然而曰然子言得之

歸歟賦

歸歟先生歸歟先生坐講六籍立談百氏窺姬孔之堂

與劉軻雄之心髓游說天子間關千里射策萬言裨闔
亂理葩吐奇霞散綺拔犀渠擢象齒曾不能八事為律
片言悟旨偃偻一命摧折委靡窮騏驎於捕鼠困干將
於補履血鵬而肉鯨兮尚不能逞刀鋸之殘濕兮又何
足舐昔薛丞相置東閣以觀士朱游拂衣而起奚扁舟
之不泛豈洞庭之無水先生笑曰嗚呼噫嘻子言小哉
病者嗜於土炭餓者甘於糠粃醉者安於遇虎怒者恬
於染指萬法非實皆由心起狐尾見於疑目牛鬪聞於

病耳宿瘤何惡顰眉何美狐裘何榮牛衣何耻吾謂戴
安道破琴而不肯作未若宋之遜秉笏而唱吟閭立本
沮氣於畫師未若禰正平遺形於鼓史抱關擊柝兮亦
悠悠彈冠結髮兮亦悠悠吾忘情於彼此者也

眉山詩集卷一

欽定四庫全書

眉山詩集卷二

宋 唐庚 撰

五言古詩

陌上桑曲

蕭疎陌上桑寂寞採桑女蠶老葉轉稀羅敷淚如雨
歛袂感雙蛾秦箏一曲歌慙慙謝郎意其如義命何

白頭吟

秋風團扇情夜雨長門意高鳥既已逝前魚自當棄賤

妾白頭吟知君懷異心祇知茂陵女不憶臨邛琴

五雜俎

五雜俎水中魚去復還天上鳧不獲已轅下駒

五雜俎各利地去復還塵埃轡不獲已貧而仕

憶昔行

憶昔方東來亭傳荒荆棘風庭紅葉亂雨砌蒼苔溼飢
虎撥門開哀禽向人泣十載却西還亭傳已完葺青鎖
揖江山朱欄趁階級行旅糧不齎大路遺敢拾蜀道無

難易人心自寬急寄言守亭者勿使狐狸入

張求

張求一老兵著帽如破斗賣卜益昌市性命寄盃酒騎
馬好事人金錢投甕牖一語不假借意自有臧否雞肋
巧安拳未省怕嗔毆坐此益寒酸餓理將入口未死且
強項那暇顧炙手士節久凋喪舐痔甜不嘔求豈知道
者議論無所苟吾欲從之遊聊以激衰朽

春日雜言二首

官居雙海棠何年植庭中風流二月間照耀一室紅舉
家惜此花具飲呼乃翁翁雖怯盃觴意難逆兒童綠醺
十分滿白眼一引空醉時忘華顛浩歌滿東風

庭前楊柳枝春來蔚然綠老翁鬢邊青已去不可復
舉杯屬春風此理竟如何轉首飛楊花春風自蹉跎

覽鏡

昔我先君子德與形氣俱褒衣佩長劍軒昂真丈夫我
生困多難廼類山澤癯頭目類麀鼠愧忝虎豹駒太倉

五斗米足食藁爾軀誰能向天子號飢訴侏儒

客至

山頭竹萬箇風來玉相戛下有屋數間蕭然如佛剎門
無車馬喧幽徑芳草茁隔窓識君聲遽起投筆札黃雞
未啄黍環堵無可殺園蔬煮淡泊山泉啜甘滑何以樂
嘉賓春禽日嘲啗

聞東坡貶惠州

元氣脫形數運動天地內東坡未離人豈比元氣大天

地不能容伸舒輒有礙低頭不能仰閉口焉敢效東坡
坦率老局促應難耐何當與道俱逍遙天地外

寄郭潛夫

我昔遊瀘江泛舟奔楚宮黔江自南來胥會涪之東黔
江清且碧瀘江濁而紅紅碧不相入分流如卧虹羣豬
激湍濤洶湧成戰攻須臾盡變濁混混顏色同清固不
勝濁此理天下通君視開成間牛李爭長雄要之贊皇
子不勝太牢公物理自古然褒貶歎無窮

寄郭虞卿

讀書老益苦瀟洒比元澹直行不由徑慎獨肯欺闇如
何已鴻冥猶復見蜉蝣撼寡和郢中曲忍辱漁陽搥斗筲
彼常態義命吾何憾屈伸固有時佳境當徐啗

送扈大夫端叟

平生未識韓不願封萬戶方幸得依劉未幾公已去三
年此留滯一味惟忠恕江水倒隨人劍嶺橫遮路那知
黃門手就寫碧蘚賦空聞隴上兒擊塊歌五袴

十月十八與舍弟登越王樓便道趨開元寺上

天池得句滿紙顛倒雜亂幾不可讀明日詮

次成二十二韻

沐浴罷趨局幽居愁杜門重登帝子樓哭弔詩人冤凭
欄參井天隱几西南坤冬深一水瘦歲晚千山髡豐稔
徧川陸太平到雞豚江城水顏雉市瓦塵迷駕坐對仙
雲宮祇隔斜陽村樓臺白水外松柏蒼雲屯天垂望羌
山雪汁融朝暾誰為四方些招此千歲魂便道訪古寺

策杖尋靈源上到山椒窮轉覺天池尊行疲犬馬力下
視烏鳶翻不應水性高疑有神物噴肯隨秋漲落况逐
夏潦渾潛通八角井散入千家盆漁村喚欲磨釣石諒
猶溫似聞扣船歌想見持竿蹲吾曹本山林朝衣裏狙
猿只應適桡車便作忘憂萱詩兼巧拙對酒雜醇醨吞
闔吏况解事不妨盡餘樽

六一堂

并序

綿州司戶解舍舊為推官廳歐陽文忠公生

於此近歲陵井譚望勉翁為參軍葺一室於
廳事之東偏號曰六一堂余聞而嘉之為賦
此篇

我思六一翁羽化四十年雖不及摳衣每願為執鞭手
彈醉翁操目覩廬陵編床頭五代史屏間七交篇詩常
諷思潁曲每歌歸田齋摹畫舫樣酒法冰堂傳此志自
弱冠到今已華顛嗟余又晚輩讀書慕先賢即彼生處
所館之與周旋時對文章安稍息簿領肩賢者果不死

瞻之猶在前似揮誅姦筆猶拏擊佛拳誰當嗣前規時
為易蠹椽勿毀魯恭宅中有夫子天

長沙示甥郭聖俞

我昔官閭中子時趨長安相過日夜飲肯使笑語乾但
知醒復醉誰問甜與酸攬衣步中庭仰首羨飛翰誓言
早歸休慎勿貪高官時未有添丁眼前惟木蘭舅甥一
分背日月雙跳丸那知十年外相見西江干拜起未寒
溫悲來各汎瀾我鬢已禿翁子顏非渥丹相從海上去

茲事人所難
陂行白漣漣
山宿青攢攢
人煙小歲後
草木深冬完
昨日次長沙
扁舟掠湘灘
中流遭惡風
滿衣潑驚湍
船如箕尾點
天作車輪團
怖畏目敢側
禱祈指頻彈
嚮非鬼神助
幾作蛟龍餐
忠信時可憑
聖賢豈吾謾
勿畏嶠南熱
我清物自寒
勿憂海邦陋
心廣身亦寬
磨刀斫鯨鱣
隱几看鵬搏
努力近藥物
明年理歸鞍
得之兩鴻鵠
龜筒不須鑽

張曲江鐵像詩

像在韶州韶人相傳
明皇悔時所鑄云

開元太平久錯處非一拍就令乏賢人何至相仙客直
道既彫喪曲江遂踈斥汲黯困後薪賈生罷前席金鑑
東高閣鐵胎空數尺妙處難形容英表良髣髴摩挲許
國姿尚想立朝色同時反弃置異代長嘆息

雙榕

水東雙榕間有叟時出遊清風衣履古白雪鬚髯虬吟
哦明月夕簸弄寒江秋驚傳里中兒不泊岸下舟君看
魑魅中有此風味不安知非黃石但恨無留侯此生鋤

犁手誤入簪紳流無功抵毫髮負罪平山丘政爾求澡
濯聞之歎綢繆摳衣倘可親跪履安敢羞得聞半偈語
一解終身憂性不喜伐國兵書非所求

圓蛤

黃犢鳴水中相顧皆愕然探之無所得有蛙僅如錢持
問旁舍翁云此號圓蛤夏潦漲溝渠喧呼自酬答卒然
聞其聲謂當可專車既見一拊掌寸莛量有餘物生元
氣中小大各異趣蛙質黃牛鳴持此欲誰附我居固已

陋爾鳴良亦村繇蠻嘖黃鸝我今思故園

白小

二年遵海濱開眼即浩淼謂當飽長鯨餬口但白小百
尾不滿釜烹煮等芹蓼咀嚼何所得鱗鬣空紛擾向來
巨魚戲海面橫孤嶠噉喁噴飛沫白雨散晴曉終然不
省錄從事此微眇短長本相形南北無定表泰山不為
多毫末夫豈少詞雄兩月讀理足三語妙人生一漚潑
誰作千歲調安能蹲會稽坐待期年釣

瘧疾寄示聖俞

體中初微溫末勢如湯鑊忽然毛髮起冷撼如振鐸良久交戰罷頂背如釋縛尚覺頭涔涔眉額如鏡鑿空日一寒暑有準如契約伏枕兩晦朔杌然如空橐平生十圍腹病起如飢鶴衰髮本無幾脫去如秋籜到今僅能步出沒如尺蠖舊聞五嶺表有此萬戶瘧而我自僑寓了不蒙閤略況子又持養何至一例著此身自空虛客疾安所托請作如是觀無病亦無藥

示蚤

先君捐館年六十疇三算我今四十三始得幼子蚤餘
齡繼前躅蚤也纔及冠況復未可知孝章積憂歎祿養
豈不欲茲事覺已緩但愛眉目秀體質淨如盥顧瞻既
精神懷抱亦氣岸今者新剔髮瑩若珠未貫見之令人
清面擁疲手腕輒然攬吾鬚霜雪落几案豈惟不肯嗔
更付一笑粲骨肉今遠矣恃汝慰奔竄行當從諸兄誦
書喧里閭而我于經術粗能分句斷發蒙要師資心孔

為關鍵許慎專偏傍張華談史漢吾家業儒久捨此無
別段不應緣一噎便欲廢炊爨及親三釜足未用萬戶
鄼人生百年期我今特未半

北歸至廣州寄惠州故人陳伯修李文輔梁昭
德

歸心如躍馬奮迅不可駐別情如故猿已去猶返顧三
年孺子社數借柱史書好在五噫孫善保千金軀舊來
談天口老去盡地力萬里不相忘寄聲問眠食

嘲陸羽

陸子作茶經竟為茶所困其中無所主復著毀茶論簡
賢傲長者彼自愚不遜茶好固自若于我有所恨便當
脫野服洗琰為一獻飲罷挈茶去譬彼澆畦畹君看禰
正平意氣真能健達與不達人何啻相千萬

寄題張志行醉峯亭

先生饒醞藉表裏皆純粹獨推糟與粕施之為政事百
里飲其德陶陶有歡意餘醺落嘉陵一江醇酒味沉酣

到山骨頽然偃蒼翠亭中時把酒坐對青山醉醉鄉在何許祇此中間是先生况多文為續醉鄉記

湖上

佳月明作哲好風聖之清湖邊得二友夜語投三更煙露兩相濕水天參互明散衣芭蕉涼曳杖枕榔輕星走拋餘光山空答虛聲歸矣不可留過幽恐神驚

蜜果

臣聞失旦雞已曉猶強鳴書生坐口窮抵死輸血誠嶺

南貢蜜果海道趨彤庭黃蜂樂受職紫鳳助揚舲忠勤
雖云至思慮良未精由來瘴癘鄉不識霜雪清土風不
待講氣象昏如醒杭稻杭稻熱水泉水泉腥而況野果
實豈足奉聖明未論體性殊已覺面目生食之倘有補
勞者甘如飴政恐無裨益所出非和平上林寧少此下
箸安可輕軒轅嘗百毒上古雜神靈武王嗜鮑魚幾諫
仗老成芻蕘復何有葵藿但自傾

夢泉

并序

潮陽尉鄭太玉夢至泉側飲之甚甘明日得
之東山上作夢泉記示予命作此詩

入道肯著相出神得佳泉起尋定中境謾意山之巔四
人蹋翫翫數里聞潺湲循聲到巉絕滿意流甘鮮雖深
石可數太察魚難筌分為縞練去濺作珠璣圓一窺宿
醒解三嚙沉疴痊恍惚尚疑夢歡呼欲成顛山間短於
井海飲鹹生涎那知道在邇幾作野遺賢事固由人興
物為知己妍誰陪濠上遊諒攜室中天雖無十丈花中

有一滴禪名酒覺殊勝宜茶定常煎蘭亭羽觴冷魚腹
青筒連新文來遠矣開卷猶淥然徑欲抱琴去臨流聽
未全不但受以耳庶幾神者先寫為夢泉操第入樂府
篇將前輒復却萬事付有緣

題史廷直郊居

黃金轉手盡郊居掩清畫山容涼肺腑竹意淨懷袖入
門簡編香無復更銅臭君看道南院豈識元德秀

送王觀復交代

文正活國手頗恨見不及官遊識其孫想像高冠岌豈
但為交承自是賢友執尤喜談性命微到鬼神泣吾曹
飲滄海百川資一吸失脚沙土間卷舌舐泥汁相依既
云久臨別百憂集去去自護持雨荷終不濕

戲贈王推官誠中

乃祖賦混成津涯極深遠家學到諸郎文字復清婉今
作劾鼠吏于理誠未穩怒草三千牘馳驛奏龍衮上問
今安在幕職補閭苑召賜數刻對歎息相見晚縱未置

青瑣亦應校黃本九萬里扶搖忽若馳峻坂

送趙元思司法

誰不從王事夙夜獨匪懈休沐猶坐曹伏日不歸廨平生熟大法餘事止小楷自稱霹靂手作縣真癰疥董宣雖強項臨事中實駭從君學吏禮稍稍識起拜今當告別去何以贈行邁二十罰自親此理須少戒

到任後寄家兄

君子所就三為食最為下起家仰寸祿此實下焉者南

山無敝廬千里就官舍但使食有魚敢言曹乏馬同寮
皆故人每事相假借況復官長賢醉歸應不罵

送鄉人下第歸鄉

閉門讀書史已讀萬卷破養氣塞天地不受一毫挫名
聲落空廓蹤跡長坎坷塵埃相邂逅齒髮嗟老大文章
心未死功業手猶唾世事若循環天理猶轉磨朝得暮
或失俯弔仰輒賀行見風雲會驚起南陽卧

郡人獻筍守以分餉羣寮而吏獨見遺守知之

命追賜焉盖不出既久而人忘之也因成一

篇

坐穩膝生踝凝塵罩藍版出少顏面生未熟城市眼爭
席人相忘饋肉禮非簡本自無光彩不必更埋鏹自知
吾免矣置酒具瓶盞起舞屬細君相對一笑莞

哀賢

仁廟乃文考裕陵真武王先帝幾于成主上賢于康時
亦有二子採薇登首陽其一猶行歌其一今云亡功在

百世外懦夫心膽張齊侯但多馬名滅身未殭

訊囚

參軍坐廳事據案嚼齒牙引囚到庭下囚口爭喧嘩參
軍氣益振聲厲語更切自古官中財一一民膏血為吏
掌管鑰反竊以自私人不汝誰何如摘領下髭事久惡
自彰証佐日月明推窮見毛脉那可口舌爭有囚奮然
出請與參軍辨參軍心如眼有睫不自見參軍在場屋
薄薄有聲稱只今作參軍幾時得騫騰無功食國祿去

竊能幾何上官乃容隱曾不加譴訶因今信有罪參軍
宜揣分等是為貧計何苦獨相困參軍喋無語反顧吏
卒羞包裹琴與書明日吾歸休

代內作

爺娘嫁我時本以君能文謂當得所托致身在青雲觀
今天下事勝負方紛紜英俊肩相摩料理不到君何妨
採藥去相與登鹿門著書示後世千載猶清芬

答

世豈無高人刻意在枯槁惜為恩愛累有志莫能保君
能喚我歸衰鬢及未葆何非有此翁那得有此媼著書
吾豈能庶幾獲幽討何必登鹿門是山皆可老

除鳳州教授非所欲也作此自寬

人生纔食頃何處分好弱刑獄即道場筦庫有真樂故
紙終日翻毛錐幾年閣百函無力致諸公誰說著今承
學校乏頗訝名字錯宿業豈無戀得治不敢躍骨肉遠
難俱囊裝貧易縛師儒要好手老大良非脚要盡識美

空抽窮知繭薄後生端所畏人材君為作豈唯嘲孝先
更恐困有若行路固知難得地幸不惡柳拖千丈絲山
集五色雀絳紗諒無有苜蓿聊可嚼况聞豆積嶺中有
不死藥

遊雪峯院書所見院在開元寺之西越王樓之

東蓋小院也

東家既崢嶸西鄰亦稜層那知齊魯間有此叢爾滕僻
路少人到掣鈴小童鷹松扉迫窄入石磴敲危登迎門

老龙吠畫壁蒼龍騰庭除靜如拭几席不受蠅青焚日
日香明續年年燈土盆養幽花古木纏枯藤雖小亦自
足無虧豈須增憶昨苦盛夏數來避繁蒸每借安禪榻
由此晝眠肱日月當幾何霜雪遂嚴凝慈竹猶踈踈惡
風遂朋朋作詩書屋壁掃滅聽寺僧

與舍弟飲

篇篇皆有酒世疑淵明詩佳趣正在此俗子那得知寄
跡杯酒中序者為之辭詩酒吾家事何用寄跡為疑者

既已陋序者良亦卑酒殊醉味同勿問醇與醜

二

濕酒澆枯腸戢戢生小詩詩中何等語酒後那復知黃
菊遂行邁徑去不復辭拒霜猶屈強其勢何能為但問
酒有無勿計官高卑江邊捕魚郎教我當啜醢

受代還眉

久客念吾土每嘆江山非及茲受代去亦復無家歸仕
宦幾半世奔走遍九圍竟無置錫土安此容膝扉還當

僦屋居況有囊金揮處鄉亦何有去國空依依

赴闕

十年餐苜蓿夢寐長闌干繼粟自不飽朝齏豈辭酸雖
無汗馬勞幾作蠹魚乾自知爬沙手未辨扶搖搏此行
敢僥倖政爾求便安恐或得所欲聖主天地寬

程義父輓詩

門戶金張貴規模鄒魯儒平生冰玉姿不受紉綺紆肯
顧博餅印甘為小兒呼舊來使劇邑下車成袴襦暮年

賦從軍隻箸安邊隅不識墓中人永懷屋上烏

代先狀寄孫熙叔

疇昔告行邁卮酒月中把蹭蹬我已歸裴徊君尚且相逢忽驚怪已覺都幻假但當呼阿素預遣置若下略聽誦靈光未敢賦換馬一醉洗塵埃萬事真土苴

古風贈謝與權行

錦囊瑤瑤奇經笥便便腹幾擬問天公如何飯不足鳴鵝變好音璞石琢良玉為報採詩人文翁能化蜀

二

我有無絃琴無絃亦無徽忘言乃能解得意心自知山
高流水深尚笑鍾子期為君奏此曲改調作別離

三

生逢堯舜君四門方穆穆賢俊日登庸不聞澗阿獨願
君攄賢業邦方有道穀毋縮袖間手軒車遠行復

眉山詩集卷二

欽定四庫全書

眉山詩集卷三

宋 唐庚 撰

七言古詩

雲南老人行

雲南老人老無力，藜杖支腰隴頭立。
道逢蜀客話平生，時復仰天長太息。
自言貫屬瀘水湄，瀘水邊徼濱獠夷。
夷之性情類蛇豕，頻肆毒螫為瘡痍。
十五年前多寇盜，一境騷然不相保。
民禾收刈虜人家，戎馬偷銜汶江草。

近來風俗多變移卷却旌旂張酒旂牛羊村落晚晴處
煙火樓臺日暮時兩眼昏花兩鬢雪喜見昇平好時節
茆屋橫吹一笛風野店攜歸半瓶月問翁致此何因緣
道是江陽太守賢鼓琴絃歌不生事十年靜治安吾邊
鄭國國僑去已久誰信人間準前有異日刊為德政碑
請問雲南隴頭叟

結客少年場

結客少年場男兒尚氣須激昂朝從魯朱家暮過秦武

陽飲酒邯鄲市膝上橫秋霜明年從軍入燉煌金印紫
綬輝路傍貧中知己慎勿忘

公無渡河

公無渡河公無渡河君不見吳兒秋悲小海唱湘女夜
怨招魂歌抱石沉清流弄酒奔素娥忠血醉蛟蜃義肉
飽黿鼉暗中水弩貫七札魚龍百怪垂涎澤吻牙相磨
公無渡河公無渡河平地猶恐生風波

明妃曲

生男禁多才長沙伴湘纍生女禁太美陰山嫁胡兒長
沙雖歸如不歸陰山亦復歸無期絳灌通侯延壽死琵琶
休怨漢天子

舞馬行

并序

明皇時教坊舞馬百疋謂之某家嬌其曲謂
之傾盃樂天寶之亂此馬流落人間魏博田
承嗣得之初不識也已而承嗣大燕軍中酒
行樂作馬聞樂聲起舞承嗣以為妖命殺焉

予讀其說而悲之作舞馬行

天寶舞馬四百蹄綵牀襯步不點泥梨園一曲傾五樂
驤首頓足音節齊幾年流落人間世挽鹽駕鼓不敢嘶
忽然技癢不自禁俗眼驚顧身顛躋後生何嘗識此舞
謂之不祥固其所

戲題醉仙崖

誰家翠嶺高亭亭白崖隱起仙人形仙人昔嘗為酒星
乘興痛飲乾北溟五湖一吸聊解醒江妃喪魄鼇失靈

上帝震怒呵出庭
酡然影落秋山青
行人幾見霜葉零
醉仙醉去不復醒
何須荷鍾隨劉伶
河沙劫填歸冥冥

古生

卷地風來怒濤起
驚散沙汀雙翡翠
誰將仙匹鎖金籠
孤飛吟叫煙波裏
古生開鎖放珍禽
春江日暖重相尋
巧舌相和葦風軟
綺翼交飛菰浪深
壯哉古生真任俠
氣義肝腸何激烈
功成不復更偷生
一劍揮霜襟濺血
世間美事多參商
白馬青梅人斷腸
古生埋沒在何處

江山流水空茫茫

走筆贈仙姑

仙姑八十春秋高兩鬢墨黑無斑毛鹿胎冠子青紗袍
神風清峻真仙曹人生瞥忽如銷膏是非海裏翻波濤
五斗官米令人勞安能俛首爭錐刀願仙乞我瓢裏一
丸藥武陵谿上抖擻世俗腥與臊不然教我蟬蛻羽化
秘訣之一二海山深處摘取王母千歲不熟之蟠桃

醉後怒筆

灰寒火冷燈微明
虛簷瀉雨如傾
瓶酒酣耳熱
身體輕
撫膺大吼黃鍾聲
怒目直視如流星
拔劍擊柱傍人驚
丈夫寧可五鼎烹
安得容此吞舟鯨

黎城酒

黎城酒貴如金汁
解盡寒衣方一吸
獄曹參軍到骨窮
簿書吻燥何由濕
夜來細雨落簷花
對客惟有嘗春茶
明朝踏月趁早衙
免使路中逢麴車

題崔令曲海後

崔令飲酒五七斗崔令唱辭一千首時時浪飲輒高歌
利鎖名韁總無有人稱崔令為顛狂我知崔令非顛狂
承流宣化有餘方高歌浪醉也何妨

晝寢效魯直

雨餘熱喘殊喊呀坐翻故紙腰足麻鋪陳枕簟塞青紗
倒牀不復知橫斜夢魂飛揚遠還家故人見我一笑譁
須臾睡覺衙鼓過牆頭暝崔聲槎槎

別永叔

巴江濫濫巴山空十里五里蕉花紅少年銳意立功業
破煙一棹輕如風却思三歲相歡聚說劍論詩輕李杜
平生不作女兒悲今日為君重回顧

李白好擊劍
僕僻亦如此

題洪川驛

倦游征人鬢欲絲膏車秣馬東南馳出門四顧迷路岐
閉戶却坐愁支頤魚生釜竈鼠巢枝稻畦千里成陂池
吾皇致治方無為淫雨破塊天何如勸君飲酒君勿疑
行使止尼良由時未逃形數皆有涯此獨未信無窮期

食筍行

半夜春山試雷雨驚起蟄龍初出土野人不惜蒼苔古
掘得嘉食自燒煮滿盤明玉遠飄風一箸鱸魚味差苦
竹齋食罷竹陰午竹裏行吟傲簪組君誇食肉君固卑
我誇食筍我亦痴阿環豐肌飛燕瘦意態雖異要皆奇
君不見天隨先生貧食杞又不見關中客卿肥刺齒豐
儉不齊皆有理彼此相忘聊爾耳

通判蘇君俞見和復次韻答之

公才過人真十倍詞藝即今誰跂及萬卷收藏富編集
詩人閭域稱優入西州書生學穿執竭來東游為祿粒
十分折腰敢長揖欲吐壯懷還自吸朋從調笑鬪捷給
狂言偶發難收拾語意俳諧韻牽繫不敢獻公公密緝
報章大是鮫人泣一一珠璣落圓濕自慙思竭如空笈
口吻悲吟殊窘急

喜雨呈趙世澤

去年雨多憂水潦今年雨少憂枯槁都緣縣政失中和

水早年年勤父老前時雲起雨欲落夜半風來還一掃
明朝引首望雲漢屋上晨暾仍杲杲賦輸百萬未破白
簿脚何緣得勾倒上書自効欲歸去老婦挽衣傍奪藁
技窮徃訴北山神是夕沛然償所禱稻畦穠稔勢已活
竹裏蕭疎聲更好故應神意閑孤拙苟免歲終書下考
便安杵臼伺秋成雲子滿田行可擣

游使君諸子歌

大游落落如長松說易妙合韋編翁胸中蘊藉入眉宇

筆下言語驅頭風少游濯濯如春柳十八書生過秦手
已將文舉呼大兒更舉長源為小友是家諸郎都幾人
傳聞一一連城珍未識龍川五袴守端似當年萬石君

戊子大水二首

踏歌喧喧雜饒鼓潭邊呼龍令作雨龍嗔揮水十大餘
千村萬落幾為魚寄謝龍神且安處熟睡深潭不驚汝
夜半傳呼河入室攬衣下床深沒膝舊來水不到譙門
老巫歸咎西門君西門君去老巫舞明年却娶河伯婦

登越王樓

已下綿州舊作

左綿城北長安道馬足翻翻人自老越王高樓藏道邊
道上行人不迷到樓前西一作落日墮江紅一見如逢鄰
舍翁由來何處識面目應在少陵詩句中

會飲尉廳效八仙體

尉公不忝東州英坐上拍滿樽中盈令尹學道眼目明
作佛肯後靈運成戶掾句法令人驚登壇抗臂從我盟
法曹靜如不能鳴胷中自有百萬兵會稽少年富才情

墨竹中含楚辭聲泮宮老人駕虛名賦詩飲酒畏後生

內前行

內前車馬撥不開文德殿前宣麻回紫微侍郎拜右相
中使押赴文昌臺旄頭昨夜光照牖是夕收鋒如禿帚
明日化作甘雨來官家喚作調元手周公禮樂未制作
致身姚宋也不惡向來兩公拜相年民間斗米纔四錢

右相視事明日始得雨上
喜甚書商霖二大字賜之

大熟行

去年大雪埋尺箠水北荔枝遭凍死共嗔北客帶寒來
我欲分疏誰受理今年諸峒十分熟東江不下龍川水
南翁北客兩欣然孰與忍飢餐荔子

蠶兒歌

瀘南二子天一邊思之不見今三年阮咸已老得遙集
白髮自媿還欣然未看頭顱并頰頤啼中已有過秦篇
諸田何得賤庶孽會斬莊賈推強燕

鳴鵲行

簷前羣鵲鳴相呼法當有客或遠書吾今何處得書尺
而況賓客乘軒車平生眼中抹泥塗汎愛了不分賢愚
卒為所賣罪滿軀放逐南越烹蟾蜍百口寄食西南隅
三年莫知安穩無家書已自不可必更望故人雙鯉魚
故人頃來絕懶疎况復萬嶺千江湖雞肋曾足安拳餘
至今畏客如於菟豈惟避謗謝還往此日誰肯窺吾廬
杜門却掃也不惡何但忘客兼忘吾喧喧鳴鵲汝過矣
曷不往噪權門朱

採藥行贈梅蟠

順途行歌醉者誰先生採藥山中歸昨日攜籃入山去
今日出山香滿路先生年來飯黃精俗眼但白髮但青
得失乘除適相補勿取讒人畀豺虎

鐘潭行

君不見惠州城之西永福古寺鐘岨竒夜輒亡去黎明
歸萍莎糲糊水淋漓山僧初驚久恬嬉一夕徑去不返
棲父老嗟惜僧垂淚明年夏旱江水低此鐘居然水中坻

奔走往視空城陴挽以巨纜牛百蹏牛喘纜絕鐘不移
度不可得乃去之江花開落水東馳到今過者猶俯窺
刻舟記劍真自癡不應此物猶沙泥

秋水行

僕夫取水古龍塘水中木佛三肘長隨波俛仰如簸糠
乘流拯之置道傍衲衣著帽僧伽裝里人觀者如堵牆
相與築室臨滄浪荷蓋荃壁辛夷梁三日屋成小而香
野草江花薦芬芳燼煙晝清夜燈光乃知實相無立鄉

人人性中普照王

採藤曲效王建體

魯人酒薄邯鄲圍西河渡橋南越悲歲調紅藤百萬計
此貢一作無窮時去年採藤藤已乏今年採藤藤轉竭
入山十日脫身歸新藤出土拳如蕨淇園取竹況有年
越山採藤輸不前今年輸藤指黃犢明年輸藤波及屋
吾皇養民如養兒鑿空為此謀者誰

冬雷行

百蟲蟄處安如家
阿香夜起推雷車
一時技癢不忍爬
撼動尺蠖掀龍蛇
龍蛇尺蠖踞已久
亦欲奮迅舒頑麻
夢中一震忽驚躍
發破墜戶排泥沙
泥沙已出雷遽止
錯愕欲去難藏遮
蟲蛇狼狽莫知數
間有伏龍吁可嗟
贈譚微之

去年絃歌程水濱
甌中生塵范史雲
今年講學鵝城裏
關西夫子楊伯起
昔人論士觀心期
時人論士看肉皮
只知黃鶴矜嘴爪
不識騶虞避生草

風樹吟

子路有言樹欲靜而風不止子欲養而親不
待予復而悲之作風樹吟以終其意

樹欲靜兮風不止子欲養兮親不俟歸飛反哺八九子
我曾不如畢逋尾

樹欲靜兮風不休子欲養兮親不留旦自梅兮暮至棘
當年飼我如鴝鳩

午起行

細藤簾展波紋綠
瓦枕竹床殊不俗
白日寥寥午眠熟
起來更覺精神足
萬緣寂靜數甌茶
半偈消磨碁一局
此間真味有餘清
未羨紛紛厭梁肉

擊劍歌

三尺光芒耀霜雪
長安使氣為任俠
間對要離壯淚垂
醉叱荆軻怒皆裂
天下承平猛士閒
夜半無人自彈鋏
會須東海斬長鯨
歸來倒漚腥臊血

城上怨

雨似懸河風似箭風號雨馳寒刮面何處巡城老健兒
城上謳吟自哀怨不知底事偏苦傷聲高聲低哀思長
戍邊役重畏酷法去國年多思故鄉城上歌時夜方半
正是孤齋醉魂斷和風和雨兩三聲推枕投衾坐長歎
傳聞邊警動熙河戰士連年不解戈今夜風號雨馳處
城上哀怨知幾何

病鶴行

鶴兮鶴兮何處來秋江靜兮蘆花開波痕侵月白皚皚

千聲萬聲鳴哀哀不飛不翔不飲啄骨癢稜稜瘦如削
冰姿玉質僅生存雪羽霜毛半零落鶴兮鶴兮何鬱鬱
我知爾是沖天物芝田就養孤高情瑤池洗出神仙骨
傳聞仙島冥冥中水晶甃作蓬萊宮祥煙瑞霧常濛濛
好將六翮搏仙風

題溫泉觀

溫泉宮裏行人宿溫泉池上行人浴人自多情感盛衰
泉固無心任榮辱細路蟠蟠入疎竹萬年秦山皆在目

吾皇高拱九重深一株松蘿為誰綠

送趙安道下第

大官危小官卑君不得官君勿悲君不見前日宰相今
海涯胡椒八百斛流落知為誰又不見州縣官折腰事
細兒常憂一語不中治敢對西山笏拄頤大官危小官
卑君不得官君勿悲願君酒量如鴟夷勿作甌窰居井
眉與君賭取醉為期明日烏帽風披披

友人還鄉有感

饑鳥啞啞枝上啼秋風蕭蕭吹客衣儒冠悞身不得歸
女癡妻寒病且老歸來聚首貧亦好我固知之歸不早
束書十載遊長安一官遠謝醫卜賢托生長鏡真可憐
今君別我還故里想見親朋問所以為言顛顚京塵裏

讀邸報

當今求多聞取士到蓬華時時得新語誰謂山澤僻昨
日拜御史今日除諫官立朝無負漢恩厚論事不妨晁
氏安臺省諸公登袞袞閉門熟睡黃綢穩

寄杜蓬州

閨中勝事不妨奇，舊來僻左人誰知。
祇緣乃祖腸斷句，名與江水東南馳。
閨人德之不敢忘，遺祠今在南山上。
壁間畫得太瘦生，想是當年苦吟樣。
寄將模本博新詩，為我落筆揮珠璣。
君家自是箇中脚，會道春從沙際歸。

中秋遇雨感懷呈世澤彥直

初遊東都年二十，清歡越得中秋及。
高陽會中酒徒集，惠和坊裏繡鞍入。
蟹螯嘗新左手執，雞頭未老搓玉粒。

盃行到手不待揖明月清風供一吸
纏頭不惜傾箱給
倚賴決科如俯拾誰知得官反拘繫
此景此歡那復緝
今歲中秋雨如泣窮山牢落秋光濕
孤燈熒熒照書笈
屈指數年如箭急

蓬州杜使君洪道屢稱我於諸公聞之愧甚賦
詩答謝

去天一尺古蓬州年來除守得勝流
渠家本是城南杜
詩律賢我三千籌

禮記投壺某賢于某若干

如此才高却解事入眼

人才皆可意他邑猶分刺史天片言每為將軍地故應
憐我退無田力相推挽令向前傍人聞說皆撫掌竹竿
那使鮎魚緣

芙蓉谿歌

人間八月秋霜嚴芙蓉谿上春酣酣二南變後魯叟筆
七國戰處鄒軻談人間三月春光好谿上芙蓉迹如掃
周家盛處伯夷枯漢室隆時賈生老小兒造化誰能窮
幾回枯枿還芳叢只因年老不復少有酒且發衰顏紅

富樂山

富樂之名誰所留建安年中劉豫州擁兵入蜀萬貌貅
孱璋送國來迎頭軍中醺酒椎千牛炙如巴山酒如涪
酒酣握手登高丘極目紫芋蹲春疇富樂之名此其由
君聞此說還信不當時兵起四十秋折屋不足供誅求
生靈嗷嗷鼎中油山中胡為乃爾優想今富樂萬倍劉
端能容我逃窮愁山僧笑言客罷休

將家遊治平院

即老杜所謂東津也

年年官職如水樣只有登臨作酬賞好山一一如佳客
令人欲作傾家釀昨日西樓弔王孫今日東津悲逐臣
江邊勝事略尋徧不見海梭高入雲

遊天池院

上方細路蟠如綰下有晴川平似坂近水遠山皆可人
踴躍來供搜句眼小池中有江湖春孤洲便可呼白萍
團團倚檻看清澈不敢洗耳山僧嗔

蘇時中惠茶

三年泮宮苦幽獨中有宜人惟睡足蟲魚注罷直廬靜
午枕鳴雷撼窻屋故人蘇子半幅書餉我閩溪一包玉
親題更屈調絃手遠寄來澆飯蔬腹故應疑我夢得官
誰信吾衰已無復空令半夜忍飢吟搜到池塘春草綠

受代有日呈譚勉翁謝與權

老來忽忽流年緊三見涪江秋葉墮祇緣二子日相從
便覺一瓢窮可忍東津曉作招隱賦西樓暮得思歸引
文字能令酒盞寬江山未放詩才窘分題踴躍誰避席

得句歡呼同彼隼泉名三逸本戲語野史千年傳不泯
醉歸半路飛蝙蝠餘興中宵伴蚯蚓那知鬚鬢禿于筆
但見兒童長如筍留滯甘為西域胡衰遲更結束遊朔
故山咫尺未成歸坐使蒼顏厚如脣

武興謠

去年山中無黍稷只有都根并橡實都根作麪如食蜜
橡實炊飯如剥栗東家有錢食橡實西家無錢惟食都
今年都盡橡實貴山中人作寒蟬枯

劍州道中見桃李盛開而梅花猶有存者漫賦

短歌

桃花能紅李能白春深無處無顏色不應尚有數枝梅
可是東君苦留客向來開處當嚴冬桃李未在交遊中
即今已是丈人行肯與年少爭春風

謝雨


農事方作雨不來稻畦麥隴飛塵埃神哀此民賜以雨
脈溝丈漕流膏乳穀肥酒香答神休神終相之俾有秋

程使君生辰歌

使君來分銅虎符哺養百姓如哺雛設弧在旦人奔走
舉首爭為使君壽但願使君如乃翁福德種種皆圓融
官至大中年九十諸郎鳴玉左右立

天馬歌贈朱廷玉

貳師城中天馬駒眼光掣電汗流朱將軍出塞萬里餘
得此龍種來執徐朝踏幽燕暮荆吳歷塊一蹶傍人呼
向來價重千金壺一朝不直半束芻千馬萬馬肥如豬



眉山詩集卷三

欽定四庫全書

集部

眉山詩集卷四至十

詳校官庶吉士臣陳若霖

侍讀臣孫球覆勘

總校官編修臣王燕緒

校對官中書臣葉蘭

謄錄監生臣任銜葵

欽定四庫全書

眉山詩集卷四

宋 唐庚 撰

五言律詩

雜詠二十首

屏跡舍人巷灌園居士橋
花開不旋踵草薶復齊腰
蛤吠明朝雨雞鳴闇夜潮
未能全獨樂鄰里去招邀

已絕經年筆仍開盡日門
身謀嗟翠羽人事歎榕根
蔬食風掀市樓居水破村
嶺南霜日薄何得鬢邊繁

便歸良不惡未去亦隨緣戶口知無瘴謳歌覺有年
藤牋得句後挂酒抱愁邊經術吾衰矣猶堪學力田

不死良難學全生或可幾茶隨東客到藥附廣船歸
碁倦收成敗書慵卷是非關心無雜慮魂夢入精微

兀坐且如此出門安所之手香柑熟後髮脫草枯時
精力看書覺情懷舉盞知炎州無過雁二子在天涯

飽食為茶地深耕覓酒材翻泥逢暗筍汲井得飛梅
湖盡船頭轉山窮屐齒回田間良自苦清興亦悠哉

壯歲日千里晚途天一方花縵聊傲世白袷亦隨鄉團
扇侵時令方書遣晝長此間吾所樂便擬卜林塘

白日消諸妄青山對屢空著書防惡客學圃問鄰翁織
貝流肌滑擯榔入頰紅丹砂落吾手秋至任飄蓬

多事定何補寡言聊自溫蠚黃嗔止酒雞白勸加飧濯
足樓船岸高歌抱朴村愧無魑可禦只益負君恩

閭窄良難入間寬足見容竹根收白疊

謂竹布

木杪得黃

封謂榔酒問學兼儒釋交游半士農行歌村落晚落日滿

攜筇

為農沙予步附保水西鄉隱几江天遠開門佛土香時
情荒徑草埜色淡漁梁欲縱高秋目東偏短作牆

舊物杯中酒新銜海上翁百非無一是顯過豈微功引
水江分碧烹丹井為紅幽居亦多事度日不全空

小市江分破連萍水捲翻到今佛跡在千古鶴峯尊浮
嶠來何處豐湖入數村登臨有何好秋至數消魂

已分詩驅使寧辭酒過差南烹人釣蛤北信客占鴉年

事侵膚理憂端宿肺家嚮來功業興到晚詠餘霞

覆載宜然等寒暄乃爾殊雪曾前歲有地過此邦無煑
海鯨鯢動烹山虎豹呼南來何所得詩語帶嫵隅

夜語不覺久晨興良獨難加之得卯酒晚矣恰朝飧筍
蕨春生箸魚蝦海入盤南方禁太飽茗盃直湏寬

海氣東南上野煙申酉間草平連別洞雨轉入佗山道
路魚鹽去樵蘇竹木還西江并北客相對各蒼顏

水過魚村濕沙寬牧地平片雲明外暗斜日雨邊晴山

轉秋光曲川長暝色橫瘴鄉人自樂耕釣各浮生
浪迹蒼梧外放懷黃木東人情雙鬢雪天色屢頭風國
計中宵切家書隔歲通為儒得愁思一笑賴兒童
萬里非吾土三年失我常只愁鳶跼跼敢作鶴昂昂
竹連閩越黃雲入夜郎何時返棲息誰為問桃娘

武陵道中

朝持漢使節暮作楚囚奔路入離騷國江通欸乃村垣
墻知地濕草木驗冬溫寂寞桃源路行人祇斷魂

長沙道中

古古今今路朝朝暮暮行
橘林香處飯杉木翠邊程
山帶湘靈慘川含楚些清
江湖無限句遷客要才情

次泊頭

何處不堪老浮山傾蓋親硯田
無惡歲酒國有長春草木
疑靈藥漁樵或異人近前端
有得丞相未宜嗔

水東感懷

往事孤峯在流年細草頻
但知其室邇誰識所存神
碑

壤詩無敵堂空德有鄰吾今稍姦黠終日酒邊身

收景初書并示藥物

乾坤心腹友江海鬢毛斑藥補他鄉闕書開故國顏何時乘下澤此日仰高山會是歸耕耦由來有賜環

九日懷舍弟

重陽陶令節單闕賈生年秋色蒼梧外衰顏紫菊前登高知地盡引滿覺天旋去歲京城雨茱萸對惠連

除夕

患難思年改龍鍾惜歲徂關河先隴遠天地小臣孤
吾道憑溫酒時情付擁鑪南荒足妖怪此日漫桃符

人日

人日傷心極天時觸目新殘梅詩興晚細草夢魂春
挑菜年年俗飛蓬處處身蟆頤頻語及髣髴到東津

直舍夜坐

強仕似幼學細書仍短檠月來吟處白風及醉時清
坐久露微濕更深秋有聲不知愁底事終夕自悲鳴

舍弟書約今秋到此

此日方收信前時已具舟開頭今歲月輟脚定中秋涼
德為兄忝炎荒代爾憂從今西望眼應到見時休

夜坐懷舍弟

無雲仍露坐有月更江臯沉陸傷吾道浮生憶爾曹扁
舟應夏口此夕數秋毫不見今三載當時已二毛

送外甥之廣州

由也久從我牢之真有甥時情為客老秋色汎船清撥

刺朝朝味鉤輶處處聲越臺休弔古旅魄向來驚

九日獨酌

登高無老伴引滿自高歌歡意天邊少重陽野外多黃
花空歲月白首尚關河他日龍山興吾今在網羅

壬辰九月二十三日始寒以詩記之

朝來怪底冷前此已重陽漸逼袴襦節稍聞炭火香煙
嵐向冬淨橘柚得霜黃嶺表雖多暑天時亦有常

十月復暄

誰會世間事即今冬後秋殘年仍御袷先日已重裘地
勢炎州令天時北客愁此生橐籥內反復任吹咻

送客之五羊二首

不到番禺久繁雄良自如江山禹貢外城郭漢兵餘圓
折明珠浦旁行異域書五羊雖足樂雙鯉未宜疎

建國今陳跡遊人合賦詩廢臺樛女後遺井鮑姑時客
去通星漢僧來自月支憑君黃木口為致海祠碑

送故人赴循州司理

溪入尉佗宮撐舟閣復通梅花吳驛外萍實楚謠東方
策他時執圜扉到日空天涯一杯酒叙別意無窮

送舍弟幹事廣州

欲罷愧決策擬行愁索居人心旱魃後旅色颶風餘擊
折秋江夜開帆曉霧初他鄉仗神力瀝膽奠扶胥

春日謫居書事

四十緇成素清明綠勝紅形容千慮後門館一貧中白
日時時別青蕪處處同此生唇舌裏啼鳥莫春風

遊廣州悟性寺寺有趙王臺蓋尉佗時所築有
井甘甚號達摩井云

崎嶇走上方浩蕩取秋光臺上經繆女江天入夜郎華
夷憑檻遠興廢引杯長泉脈來何處中含定慧香

春歸

東風定何物所至輒蒼然小市花間合孤城柳外圓禽
聲犯寒食江色帶新年無計驅愁得還推到酒邊

驟雨

黑雲驚小市白雨沸秋江
聲入家家樹涼傳處處窻
亂流鳴泱泱鼓鬧龐龐蘋
末清風起斜陽覩海邦

江漲

秋來雨似澆雨罷水如潮
市改依高岸津喧救斷橋
雲陰哭鳩婦池溢走魚苗
天意良難測前時旱欲焦

代書寄鄭二

別後定何似此中難具陳
倦憎秋氣濕老怯曉煙辛
沸議今方爾歸期覺愈伸
須煩三絕手時復餉清新

八月十五夜月

應緣人望望故作出遲遲幾歲一相見浮雲寧別時吟
拚雞腸脾玩覺兔迷離此夕登樓興非關有所思

立冬後作

啗蔗入佳境冬來幽興長瘴鄉得好語昨夜有飛霜籬
下重陽在醅中小至香西鄰蕉向熟時致一梳黃

漫成

雲暗便窻破山寒賴屋低往還天外少早晏雨中迷書

冊開仍闔履聲東復西何嘗有所賦得句旋安題

野望

賴有澄江在專供倚杖清水栽偏岸直雲截亂山平
鞞鼓知農隙雞豚覺歲成却緣搖落後木杪得孤城

獨遊

是日游子獨幽情知者誰時光新舊歲節物淺深枝
鴉攫春祠敏鳶窺野燒癡田園有妙理吾悔得之遲

醉眠

山靜似太古日長如小年
餘花猶可醉好鳥不妨眠
世味門常掩時光筆已便
夢中頻得句拈筆又忘筌

江陵逢故人宋德粹自播守罷歸南陽以詩見

貽依韻和酬

昔別方初節相逢各素秋
君歸卧龍國我脫墮鳬州
霜鬢含多事塵容帶倦遊
行藏端可見歲晚莫登樓

舟中

去楚及梅落過夔逢麥秋
既非就國者判作賈胡留心

力盤灘盡年光拋渡休移書故山友慎勿厭鋤耰

北嵌

雙鬢莖莖白孤舟寸寸移北嵌方守霽南畝定何時無
處謀春酌他村博晚炊頻年臥江海寧卹一灘遲

何執中輓詞

白壁就黃壤忘情良獨難觀生六十化比沒九遷官筆
下無時俗胸中有歲寒雅懷嗟不遂欲掛死前冠

王元隱輓詩

雙鬢繡經老千金食客貧由來戶外屨不救甌中塵惜
此凌雲手終於入幕賓何人禪家學崔篆得崔駰

次韻強幼安冬日旅舍

殘歲無多日此身猶旅人客情安枕少天氣舉盃頻挂
玉黃金盡風埃白髮新異鄉梅信遠誰寄一枝春

直舍書懷

寸枉非吾志休論尺與尋黃披終日卷青對十年衿風
眩藥囊減雨昏茶碗深揚雄名宦思都向草玄沉

書齋即事

書生不事事書齋春晝長
竹色語笑綠松風意思涼
簟瓢樂仁義圖史按興亡
此間有佳趣此外皆茫茫

題所居

鼾睡失青春昏昏尚欠伸
素知行路惡敢厭在家貧
搜句工雖淡看書味頗真
搬來端不喜毛義已無親

夜坐感懷

聲斷鐘樓月文書對坐時
破窻燈焰走凍硯筆鋒遲
名

利髮將鶴風霜手欲龜何當一蓑雨披曉剪萼絲

秋夕書懷

疊疊歲華侵垂垂老境臨時光自風雨寒色到衣衾萬
竅號秋杪孤燈照夜深蛩聲亦清苦唧唧伴人吟

雪意二首

睡眠拭朦朧開門雪正濃客來迷舊徑虎過識新蹤浦
遠渾無鶴林疎只有松惜琴如不解酒興若為供

揄闕書不至雪又滿平蕪指冷頻呵玉冑寒屢掩酥綠

嘗冬至酒紅擁夜深爐塞上風沙惡征衣到也無

張祖同輓詩

西南失望郎天理信茫茫豪逸陳驚座風流馬季常才
宜分竹使恩不自椒房清白今方著羣兒勿謗傷

任太君輓詞

賢婦古亦少紛紛何況今栢舟全美志綵服慰幽心舊
邑虛湯沐新阡祔藁砧子孫門戶壯誰敢齒諸任

送太學李生歸鄉

挈笈來東序經年亦倦遊却辭同舍去聊慰倚門憂顏
子進未止何蕃誰為留到家席不暖隨計又皇州

送朱元素歸養

事國日猶長歸寧計亦良泉烹純孝味菽啜自然香失
馬君何患臨河我獨傷從今千里夢夜夜到江鄉

調華陽尉

家世傳儒素平生學古文三年思故國一命荷明君折
節羞黃版歸休許白雲吟詩無廢事薄俸不禁分

孟東野尉

平陽淫於詩曹務盡廢郡
置假尉以代之分其半俸

嘉陵江上作

多士數車肥誰令汝去家坐禪腰已折持劍手新叉雖
未能空寂然猶耻攬擎江流何處去憑仗弔懷沙

自笑

已白窮經首仍丹許國心那能天補綻更欲海填深兒
餒嗔郎罷妻寒望藁砧世間南北路何用爾霑襟

率諸公飲開元寺勉翁有詩因次其韻

三伏光陰過初秋宇宙新一杯相馬酒

漢制學馬給相馬酒蓋薄也

千古竹林人

座上人

山入永嘉履蟻浮彭澤中悲歌送落

日為我少停輪

夜久睡覺不復能寐淒然有感

無復更殘曙夜深清欲飢葉飛魂夢數露重語音知月
色到秋苦更聲臨曉遲平生憎墨翟老去亦悲絲

將赴闕有感示聃

老畏高門地慵便下澤車終然嬰世網難作愛吾廬白

首趨行在青袍奉起居平生誇好手到此不如疏

別閩中許秀才

許歸閩
予歸蜀

臨岐長歎息此歎意深微浮世年年別初心事違捫
參蜀道遠犯斗海槎歸故國有餘樂黃雞秋正肥

直舍書懷

箇處本來冷此時仍更清擁爐成久坐曳杖却徐行暝
色侵書帙秋陰入鼓聲悠然索馬去祇此是功程

眉山詩集卷四

欽定四庫全書卷

眉山詩集卷五

宋 唐庚 撰

七言律詩

瀘人何邦直者為安溪把截將有功不賞反得

罪來惠州貧甚吾呼與飲為作此詩

楚人季布以勇顯魯國朱家用俠聞馳馬彎弓臣好武
吹毛洗垢吏深文王孫此日誰漂母鄉子前時號冠軍
滿引一盃齊物論白衣蒼狗聽浮雲

余在惠州作酒二
種其和者名養生

主其稍勁者名齊物論
後禁主字遂去其一

有所歎二首

林中晏坐老沙門，豈願頻年觸垢氛。
正恐先生不得飽，欲令後死與斯文。
近逃台鼎居東洛，聞道衣冠滿北軍。
須信此塗天一握，人間漫說有孤雲。

耕田佩印兩徒然，憶相平津只去年。
怪底功名稱地獄，誰將官府到天仙。
是非已付漁樵判，疑信難憑黨與傳。
杯酌豈能通大道，床頭當得酒如泉。

舍弟既到有作

武陵倉卒記他時我獨南翔子北飛
覩過幾多歸後事相看仍是別時衣
匪躬老矣惟心在便腹依然但髮稀
尚有苦吟三十載與君同飽蜀山薇

叔景初貶所書

信斷常懷信斷憂得書還有得書愁
未應宿業都相似總為謫聲不肯休
見說胷中卷雲夢莫將皮裏貯陽秋
而翁有道知興廢不患無詞詣播州

次勾景山見寄韻

此生正坐不知天，豈有稀苓解引年。
但覺轉喉都是諱，就令搖尾有誰憐。
腰金已付兒曹佩，心印還當我輩傳。
他日乘車來問道，葦間相顧共攀緣。

夜聞蚤戶叩船作，長江礪欣然樂之殊。
覺有起予之興，因念涪上所作招漁父詞，非是更作此詩，反之示舍弟端孺。

當年無奈氣，狂何醉撒涪翁棄。
短蓑晚落炎州磨歲月。

欲從諸蜚丐煙波與君共作長江礪况我能為南海歌
身世即今良可見不應老子尚婆婆

北風累日不止寒甚寄鄭潮陽

山前臘雪想紛紛風到南訛盡處村甕面不容存酒子
床頭幾欲爨桐孫園林呼舞知衰怯窻戶奔馳覺眩昏
咫尺潮陽五袴國可能分我一襦溫

長沙竹筍聞於天下大者可十斤重食之甚甘
而不冰脾昔渡湘欲作詩未暇也今復過之

酬以此篇

地入長沙莫歎卑竹萌徑尺舊相知九重纔復金門籍
萬里先參玉版師契闊累年真負口徘徊彌月未妨脾
渭川風味那能對中有離騷九辨辭

閒居二首

未許幽人曉夢長朝朝親炷佛前香有詩為愛袁家酒
無病緣抄陸氏方身雜蜚中誰是我食除蛇外總隨鄉
白沙翠竹門前路疑出西郊向草堂

細細敲門細細應老翁方曲畫眠肱魚陂舊種千頭鱸
桑徑新窠十畝繒菜足尚堪分地主米餘翻欲供鄰僧
平生雅有乘桴興咫尺滄溟去未能

聞勾景山補塾屋丞仍聞學道有得以詩調之
發萬里一笑

人言塾屋似江湖莫對丞哉歎負余別後耳根無正始
向來紙尾得黃初可憐鬼谷縱橫口今讀神溪縹緲書
臣朔許長錢許少何當天子念公車

鄭太玉送子魚

便當權閣太常齋藥竈于傍手自煨須信子魚藏妙理
坐令母蟹媿几才刀頭定向何時得劍脊頻將好意來
老去少陵雖病肺尚堪持此薦寒醅

鄭二鎖試五羊久而不還問之廣人云已失解
從海道歸潮矣聞之惘然唁以此詩

望君挹取裊然首為我迂回長者車璧玉已聞歸間道
足音那復念逃虛卑微官職緣親屈眊驍情懷賴酒除

政使登名似韓子十年曾不補遺餘

退之復志賦哀白
日之不與吾謀兮

至今十年其猶初豈不登名
於一科兮曾不補其遺餘

端孺糴米龍川得粳糯數十斛以歸作詩調之

倒拔孤舟入瘴煙歸來百斛瀉豐年炊香未數神江白
米釀滑偏宜佛跡泉飽去定知頻夢與醉中何至便妨
名禪憑君為比長安米看直公車牘幾千

聞鄭二對吏五羊

舊友年來畧散亡新收鄭子亦遑遑歲云暮矣無雙鴈

我所思兮在五羊獄吏事權先自貴書生蹤跡況能狂
風流人物今餘幾可忍羣兒復謗傷

西溪

西溪霜後更沉涵溪上愁人雪半簪市散爭歸橋納納
櫓搖不進水潭潭利傾小海魚鹽集味入他村酒茗甘
百里源流千里勢惠州城下有江南

憫雨

老楚能令畏壘豐此身翻累越人窮至今無奈曾孫稼

幾度虛占少女風
茲事會須星有好
他時曾厭雨其濛
山中賴有菜糧足
不向諸侯托寓公

故游茂先大夫元祐初為唐安守豪逸喜賓客
能劇飲談笑蓋陳孟公之流今唐安絃索之
盛甲於兩蜀自游使君始後累遷至秦鳳憲
以卒既二十餘載而其子振旅遊嶠南相過
於惠州作此詩贈之

唐安千指錄琵琶故事猶聞蜀叟誇樽酒何人陪北海

練裙今日見西華子歸未得頻芳草我老無成學種瓜
萬里相逢俱白首班荆長語夕陽斜

次張天覺見贈韻

別公歸去養天和見說清朝士已多裙捨登門何處曳
頂緣受記昔曾摩幾時傳說重調鼎去歲成湯已解羅
會引鑑湖為故事要從英主乞三峨

重陽後一日從無盡泛舟遊處士臺故詩人秦
龜從所居

卑河經雨水微沙船帖臺根日未斜三徑就荒悲白土
一樽相屬對黃花已將遠眺收平楚更遣清言到永嘉
要見仙翁頭似漆請看醉後落烏紗

扣前韻

附

無盡

東湖水落露堤沙舟過湖心藻荇斜野逕小橋穿竹
巷烟村疎柳間蘆花新杭炊熟臘脂白活鯽珍於丙
穴嘉飲散肩輿乘皓月燭籠何用兩行紗

走城西別處厚居正兩宗兄會居正出獨與處

厚笑語終日頗有卜鄰之興因屬買田江陵
作此詩

舊交零落半存亡晚歲荊州得兩唐臨別眼中無小謝
再來天外有他楊預行後日誅茅地要近先生避世牆
會與幽人數晨夕可能結客少年場

悼楊隱之承事

忍能揮淚讀豐碑平昔修為我自知一日不齋無此理
五行並下記他時肯教靈運先成佛未信王家敢譽兒

耆舊卽今零落盡鶴歸空嘆冢累累

譚勉翁詩章老夫所畏而以能問於不能此殊
不可曉也媿而作詩

高才乃爾信虛名句法時來就考評投社得君真惡客
專門知我有先生文章已逼三都賦行輩猶推四海兄
細看劉侯詩自好不應便伏老彌明

既以前韻贈勉翁復懷廷玉因次前韻

千金駿骨買虛名驥老通衢價未評
逐去定知窮不死

向來元以句為生東風又見鶯朋友北信難憑雁弟兄
欲寄此懷惟有月天涯分與故人明

述懷

名字雖云繫列曹儒風門戶只蕭騷頭顱自揣宜藏拙
指目何妨笑養高本以食貧來仰祿豈於王事更辭勞
老來精力堪驚歎一紙文書輒數遭

題春歸亭

沙際春光又自歸亭前景物故應奇綠楊雅與清江稱

殘雪偏於碧嶂宜流水無憑何處去東風有準不吾欺
芳菲欄檻無窮興消得新愁入鬢絲

和程大夫荔枝

家在岷峨飽荔枝十年遊宦但神馳側生流論今千載

左思蜀都賦
云側生荔枝

入貢稱珍彼一時定是不將凡果比

曹子建云

龍眼凡果
非荔枝比

如何偏與瘴煙宜白頭莫作江南客辜負山

中故友期

坡曰荔枝已成吾髮
白猶作江南未歸客

俞和叔座上賦白鹿

洞中於世本無求

取白鹿洞

一落人間幾見秋和月看時迷

濯濯隔雲聽處認呦呦未容鶴客矜風韻應許猿翁作
品流莫把奇毛驚俗眼恐妨歸去舊山幽

寓精道齋有感懷家山二首

論兵作賦兩忽忽人事光陰轉首空五夜夢飛山色裏
一年秋在雨聲中揚州騎鶴非無意上蔡牽黃信此窮
幸有林泉未歸去欲將清興問征鴻

悠悠功業老堪怜舊事憑誰可共論直欲酒中賒快樂

尚能花裏覓寒溫詩書誤我成何事歲月侵人不見痕
汾水年年秋雁到庾郎何處不銷魂

晚春寄友人二首

眼底春愁惱殺儂揚州往事旋成空風流只合稱狂客
衰颯何堪作病翁水國春深梅子雨江天日暮鯉魚風
何時執手同樽酒收拾清歡笑語中

滿眼蕪菁斷送春多情饒病兩關身只知老去人心改
不覺愁來酒盞頻霜鶻空拳知有命溟魚竭水恐傷神

丈夫出處端無據猶欲辭家再入秦

送蘇教授赴闕

三年泮水振洙風俯接諸生屢改容
嶺霧因時難隱豹巖雲有便得從龍
久欽才調無雙手今喜聲名達九重
拂袖漢陽休更問丈夫事業出心胷

贈瀘倅丘明善二首

吳頭楚尾秀山川一分才華占得全
和氣暖敷冬有日清風寒壓瘴無煙
分麾共領南門鑰簪筆終歸北闕天

寄語江陽夷落道安排春織待新編

育井夷人織蠻布為弓衣小其文織

梅聖俞詩

可曾為客到江陽塞上蕭條斷旅腸
歌動竹枝終日楚笛吹梅蕊數聲羌
仰天太息輸銜憤被髮驚呼不為狂
校尉自能青白眼肯教牛尾一般黃

天寧節口號

九曲昆渠換碧流挺生英主間千秋
謳歌萬國纔歸禹損益三年便繼周
南畝暗侵山色盡西陲展到海邊休

不知誰是乘槎客為採蟠桃薦冕旒

書新堂

壘茅重葦一堂新設榻聊安簿領身落枕不知鶯樹曉
汗書長苦燕泥春獄官何預青苗事野意新便白葛巾
能向此間時得趣何須分外拜車塵

除夕感懷

永漏侵春已數籌地爐猶擁舊絺裘無心豈畏三尸訴
愛日還驚一歲休故國三千空醉眼新年五十恰平頭

光陰未用相敦迫領取衰翁兩鬢秋

春日郊外

城中未省有春光城外榆槐已半黃
山好更宜餘積雪水生看欲倒垂楊
鶯邊日暖如人語草際風和作藥香
疑此江頭有佳句為君尋取却茫茫

上張安撫

一劍縱橫敵萬夫少年功業負雄圖
時平不佩將軍印任重来分刺史符
膝上細絃調雅操塞前蠻柵長平蕪

自慙子美詩才少難詠花卿絕世無

次勉翁送客韻

仕官方誇四十強江山那復戀蒼茫
征鞍過我橫春色別酒斟君釀野芳
青史功名時執手紅塵歧路一愁腸
神錐可是藏鋒物要使兒曹看脫囊

南遷

去去寬鄉託此蹤閨中無地頓衰翁
未誅綺語猶輕典更賜羅浮有底功
蝦菜賤時皆兩穴茅柴美處即耶筒

著鞭要及春前到趁賦梅花庾嶺東

初到惠州

盧橘楊梅乃爾甜肯容遷謫到眉尖因行採藥非無得
取足看山未害廉辨謗若為家一喙著書不直字三緘
老師補處吾何敢政為宗風不敢謙

謝人送酒

世情不到海邊村載酒時來餉子雲便欲醉中藏潦倒
已將度外置紛紜細思擾擾膠膠事政坐奇奇怪怪文

喚取鄰翁傳杓飲漸令安習故將軍

叔家書

西州消息到南州骨肉無他歲有秋驥子解吟青玉案
木蘭堪戰黑山頭即時旅思春冰坼昨夜燈花黍穗抽
從此歸田應坐享故山已為理菟裘

寄潮陽尉鄭太玉

又種羅浮一熟田江陽未得返耕廛書來似見眉間印
別後新增鬢上年下澤有車人悞矣上林無報雁徒然

去歲引病
自陳無報
越巫雞卜聞之久為問行藏若箇邊

次鄭太玉見寄韻

度外歸期未要論
故山石筍自高蹲
他時名譽牛心炙
晚歲窮空犢鼻褌
君有詩書兼畫絕
我無德爵但年尊
音塵不繼應相悉
萬事而今付默存

船居

憑誰舉此問瞿曇
已築虛空作小菴
維摩經虛空作室無有定處
不

但燕閒充泛宅
亦堪來往寄浮騖
江湖有理吾將老
魚

鳥無心客自慙非復雲安憂斗水牀頭垂手得清甘

壬辰九月不雨至癸巳年三月穡事去矣今夕

輒復霈然喜甚卧作此詩

老去生涯白木鐙脫逢艱食更何堪春深野色憂年惡
夜半簷聲覺雨甘睡外莫聽泥滑滑想中已覩麥含含

明朝竹徑添幽事玉版堂頭作小叅

筍有玉版
長老之號

大觀四年春吾與友人任景初舍弟端孺自蜀

來京師至長安時方寒食吾三人相與戎服

遊九龍池飲酒賦詩樂甚是歲吾遷嶺表明
年景初亦謫江左忽忽數歲皆未得去寒食
無幾念之悽然作詩寄任因命舍弟同賦

居今行古任定祖底事遷延亦未歸我坐力田傷地脉
君緣搜句漏天機故都回首三寒食新歲經心兩濕衣
學道一生凡幾化不因到此始知非

乙未正月丁丑與舍弟棹小舟窮西溪至愁絕
處度不可進乃歸溪側有兩榕甚奇清陰可

庇數十榻水東老人嘗飲酒其下云

楊梅溪上柳初黃
荆竹岡頭日正長
獨木小舟輕似紙
一尊促席穩于床
樹從坡去無人識
水出山來帶藥香
應有居民解秦語
為言昭代好還鄉

有感示舍弟端孺并外甥郭聖俞

一出湟關五見梅
愚忠幾欲伴黃埃
弟兄手足窮孤竹
母子肝腸泣老萊
好語忽從天上落
行人直向海邊回
此生報國無他事
力穡供輸莫待催

遣興二首

南來不覺兩秋砧
覽鏡驚呼雪滿簪
平日不堪文館冷
暮年更賦武溪深
敢緣三已有愠色
自笑一生能苦心
安得素絲隨里閭
難走狗任浮沉

八千岐路愁何補
四十光陰老亦宜
此去只堪犀首飲
向來都是虎頭痴
逢時有道其如命
得意無言所恨遲
詩債即今渾倚閣
新篇惟有莫相疑

兒曹送窮以詩留之

世中貧富兩浮雲已著居陶比在陳就使真能去窮鬼
自量無以致錢神抑車作別非吾意竹馬論交只汝親
前此半癡今五十欲將知命付何人

東麓

經旬不見小匡廬忽爾相逢喜欲呼自入秋來更韶潤
却從瘦裏帶敷腴人間信有傷心碧坐上那無滿眼沽
可是清暉解娛客能令腸斷到愚儒

贈博士承議無盡

南歸遷客氣平和磊落胸中所得多
白日過從唯陸誥清宵夢想適維摩
徘徊未忍捐雞肋寂寞猶能顧雀羅
好與鄉人敦薄俗莫因哺啜負岷峨

和觀文相公立春日示詩

閒把流年指上輪朝來七十五迴春
一杯願薦喬松壽四海方依社稷臣
血氣未嫌辛菜冷顏容猶稱彩幡新
清詩小字傳觀處滿座驚呼覺有神

生還至宜都逢李六

更把餘年著酒澆莫談前事廢燈挑地緣有語封還止
印為無功鑄復銷賴是詩書能却瘴到今魂夢亦聞潮
頭西歸去君休怪尾段無多不奈焦

次韻幼安留別

白頭重踏輭紅塵獨立鵷行覺異倫往事已空誰叙舊
好詩乍見且嘗新細思寂寂門羅雀猶勝累累冢卧麟
力請宮祠知意否漸謀歸老錦江濱

哀詞二章

雲霄才業逝川東學易年齡一夢中
春殿昔抽蟾桂綠
夜臺今隕幕蓮紅殘章斷橐塵埃滿
別院疎簾笑語空
千古龜山原口墓暝煙蕭索白楊風

文章泮水動英遊玉殿騰名十四秋
蓮幕未平臺省志
薤歌潛引古原愁青雲氣義千金薄
綠綬恩綸一命休
科第不窮餘訓在鳳毛森秀紹箕裘

獲蠻賊代主簿賀張安撫

詔書頻促馬頭東更為邊民縛狡童
三箭不煩仁貴手

七擒自得武侯功
梟鷄已去古巢冷
狼子不歸秋穴空
何用聲名達朝聽
恐妨辟穀伴喬松

眉山詩集卷五